

Dr. Dr.h.c. Carl Stemmler, 1904-1987 : er het alli Dier gäärn gha

Autor(en): **Miville-Seiler, Carl**

Objektyp: **Article**

Zeitschrift: **Akzent : Magazin für Kultur und Gesellschaft**

Band (Jahr): - **(2010)**

Heft 4: **Schwerpunkt Zoo Basel**

PDF erstellt am: **23.07.2024**

Persistenter Link: <https://doi.org/10.5169/seals-842848>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern. Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden. Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Dr. Dr.h.c. Carl Stemmler, 1904 – 1987:

Er het alli Dier gäärn gha



lirem Zoologische Gaarte saage d Baasleren und d Baasler «Zolli» – die Kurzform deent wien e Liebesergläärig; im Grund isch s au aini. Wenn sich die elteri Generation an iiri Zolli-Erlääbnis vo friener bsinnt, no kunnt ere dr Ooberwäärter Carl Stemmler in Sinn, wien er mit «syne» Schimpanse gspiilt het und mit ene spaziert und veloogfaaren isch. Wenn si ab uff d Bäum und trotz allem Riefe nit aabekoo sinn, het er numme miesse wyterlaufe, drno sinn si em gschwind noochegrennt.

Uff d Wält koo isch dr Stemmler z Schaffhuuse. Sy Vatter isch e bikannte Kürschner, Preparator, Ornitholoog und Sammler gsi, wo zwai wichtigi Biecher iber d Aadler in dr Schwyz gschriibe het. Dr Soon, unser Carl, het zeerscht welle Medizin studiere, aber sy groossi Dierliebi het en in en anderi Richtig glänggt. Er isch 1927 Dierwäärter im Basler Zolli worde, zwanzig Joor speeter Ooberwäärter. Als Autodidakt isch er ze groosse zoologische Kenntnis koo und e rächten Expäärt in Sache Dierhaltig worde. Bsunders am Häärz glääge sinn em d Schlangen und d Schildgrotte, d Aideggse und d Veegel und am maischte d Menschenaffe, won er fir si e ney Fueterprogramm entwigget het. Alli Wält het gstuunt, won em d Gorillamueter Achilla iir Buschi in d Aerm gää het; das het no kai andere fertigbrocht. D Orang Utan hänn en fir ain vo iinen aagluet und sym Noofolger zeerscht dr Zuedritt verweert. Won er aber noo dr Pangsonierig wider byn enen uffdaucht isch, het dr Orang Utan Nico gmaint, er miess sy Dominanz vertaidigen und het em e Finger abbisse. 1945 isch em d Zucht vo Pythonschlange glunge, 1959 isch under syner Obhuet s beriemt Gorillamaitli Goma geboore worde.

Dr Carl Stemmler isch aber au usserhalb vom Zolli aktiv gsi. Er het in Zytige gschriiben und Biecher pu-

bliziert, zem Byschpiil «Tiere im Zoo», «Kinder fragen» und «Haltung von Tieren». Legendäär sinn syni Radiosändige gsi, vor allem die fir Kinder. Däwääg het er bi zwai Generatione dr Sinn fir Dierschutz und Umwält gweggt, wo das noonig groossi Moode gsi isch. Noo dr Pangsonierig het er im Grosse Root (vo 1968 bis 1980) und im Burgergmaindroot fir Dierschutz und Umwält und geegen Atomgraftwärgg kämpft. Fir all das het en d Universiteet Basel ane 1971 mit em Eeredoggeter-Titel uuszichnet.

Fir syni Ideal het sich dr Carl Stemmler au als Redaggeter von ere Dierschutz-Zytig und als Mitgליid vo dr Redaggetionskommission vom Jugedschriifewärgg yygsetzt.

Am letschte Daag vom Joor 1987 het e ryych Lääbe sy Aend gfunde. Was blybt, isch d Erinnerung an e charismatische und llydeschaftlige Dierfrind, Zooloog, Fachmaa uff em Gebiet vo dr Dierhaltig und populääre Kämpfer fir d Dierwält und d Natur.

Carl Miville - Seiler